

**Bosna i Hercegovina**  
**FEDERACIJA BOSNE I HERCEGOVINE**  
**FEDERALNO TUŽITELJSTVO**  
**FEDERACIJE BOSNE I HERCEGOVINE**  
**SARAJEVO**  
**Broj: A-396/07**  
**Sarajevo, 05.11.2007. godine**

**KANTONALNIM TUŽILAŠTVIMA OD 1 DO 10**  
**n/r glavnih kantonalnih tužilaca**

**Poštovani,**

*Polazeći od toga da je članom 12 stav 1 Zakona o Federalnom tužilaštvu Federacije BiH utvrđena obaveza Federalnog tužilaštva FBiH da prati i proučava probleme iz prakse tužilaštava u Federaciji BiH, a članom 9 stav 1 istog zakona obaveza glavnog federalnog tužioca da nadzire rad kantonalnih tužilaštava u cilju garantovanja zakonitosti i efikasnosti postupaka,*

*imajući u vidu saznanja iz neposrednih kontakata sa glavnim kantonalnim tužiocima, saznanja iz podataka o stanju i broju predmeta u radu kantonalnih tužilaštava koja proizilaze iz godišnjih i polugodišnjih izvještaja, kao i saznanja iz pregleda rada kantonalnih tužilaštava,*

*uvažavajući posebno činjenicu opterećenosti kantonalnih tužilaštava, nakon stupanja na snagu važećeg Zakona o krivičnom postupku Federacije BiH, velikim brojem neriješenih istražnih predmeta, kao i činjenicu godišnjeg priliva novih krivičnih predmeta,*

*Federalno tužilaštvo FBiH konstatuje da te činjenice znatno utiču na efikasnu primjenu Krivičnog zakona Federacije BiH, kao i efikasnost krivičnih postupaka, koje okolnosti negativno utiču na autoritet tužilaštava i uspostavljanje povjerenja javnosti u rad tužilaštava.*

*S obzirom na to, a u cilju poboljšanja efikasnosti postupaka i efikasne primjene Krivičnog zakona Federacije BiH, glavni federalni tužilac, na osnovu člana 20 stav 1 Zakona o Federalnom tužilaštvu Federacije BiH, donosi*

**OBAVEZNO UPUTSTVO**

- 1. Glavni kantonalni tužioci dužni su analizirati stanje:*

- svih neriješenih prijava (po licima) u tužilaštvu, te utvrditi:
  - a) broj neriješenih prijava u kojima je proteklo do 6 mjeseci od dana prijema prijave,
  - b) broj neriješenih prijava u kojima je proteklo do godinu dana od dana prijema prijave,
  - c) broj neriješenih prijava u kojima je proteklo više od godinu dana od dana prijema prijave,
  - d) broj neriješenih prijava u kojima je proteklo više dvije godine od dana prijema prijave,
  - e) broj neriješenih prijava po kantonalnim tužiocima u kantonalnom tužilaštvu sa pregledom dužine trajanja rješavanja prijave u odnosu na prijave sa kojima su zaduženi (tačke a, b, c, d).

*Analiza stanja neriješenih prijava treba da sadrži pregled objektivnih i subjektivnih uzroka koji su doprinijeli nerješavanju prijave: nepotpunost prijava – izvještaja, neažurnost i neefikasnost postupanja drugih organa po zahtjevima i nalogima tužioca, sporost i neefikasnost ili opterećenost postupajućeg tužioca i sl., jer pravilno definisanje uzroka uslovljava sadržinu mjera i aktivnosti koje je potrebno preduzeti u cilju poboljšanja efikasnosti rješavanja neriješenih prijava.*

*Analiza stanja neriješenih prijava treba da sadrži konkretan pregled mjera i aktivnosti koje će se preduzeti u cilju poboljšanja efikasnosti njihovog rješavanja.*

***Rok:*** za izradu ove analize ostavlja se rok do 31.12.2007. godine, s tim što će se analiza aktuelizirati i usaglasiti sa podacima iz godišnjeg izvještaja tužilaštva za 2007. godinu, a nakon toga do 28. februara 2008. godine potrebno je sačiniti plan rješavanja neriješenih prijava u kome će se tačno precizirati nosioci posla, mjere i aktivnosti koje je potrebno preduzeti i rokovi konačnog rješavanja neriješenih prijava gdje je to objektivno moguće. ***Prema tome, rok za dostavu analize neriješenih prijava Federalnom tužilaštvu FBiH je 31.12.2007. godine, rok za dostavu analize neriješenih prijava, aktueliziranu podacima iz godišnjeg izvještaja za 2007. godinu, je 31.01.2008. godine, a rok za dostavu plana rješavanja neriješenih prijava je 28.02.2008. godine.***

2. Glavni kantonalni tužioci su dužni analizirati:

- stanje neriješenih istraga (po licima) u tužilaštvu i to:
  - a) broj neriješenih istraga u kojima istraga traje duže do 6 mjeseci od dana donošenja naredbe o provođenju istrage,

- b) broj neriješenih istraga u kojima istraga traje preko 6 mjeseci do godinu dana od dana donošenja naredbe o provođenju istrage,
- c) broj neriješenih istraga u kojima istraga traje duže od godinu dana od dana donošenja naredbe o provođenju istrage,
- d) broj neriješenih istraga u kojima istraga traje duže od dvije godine od dana donošenja naredbe o provođenju istrage,
- e) broj neriješenih istraga u kojima istraga traje duže od tri godine od dana donošenja naredbe o provođenju istrage,
- f) broj neriješenih istraga po kantonalnim tužiocima sa pregledom dužine trajanja istraga u predmetima sa kojima su zaduženi (tačke a, b, c, d i e).

*Analiza takođe treba da da pregled objektivnih i subjektivnih uzroka koji su usloveli dužinu trajanja naređene istrage, a nakon toga pregled mjera i aktivnosti koje se trebaju preduzeti u cilju efikasnog okončavanja istraga sa tačno naznačenim izvršiocima i rokovima za izvršenje naloženih mjera.*

*Na osnovu izrađene analize potrebno je izraditi plan rješavanja neriješenih istraga koje traju duže od 6 mjeseci u kome će se u svakom predmetu naznačiti potrebne mjere koje je neophodno preduzeti (član 240 stav 3 ZKP-a FBiH), nosioci izvršenja mjera i rokovi za preduzimanje potrebnih mjera.*

***Rok:*** za izradu ove analize utvrđuje se rok 31.12.2007. godine, s tim da će se podaci ažurirati i uskladiti sa podacima iz godišnjeg izvještaja o radu tužilaštva za 2007. godinu, a potom donijeti plan rješavanja neriješenih istraga najkasnije do 28. februara 2008. godine. ***Prema tome, rok za dostavu analize neriješenih istraga Federalnom tužilaštvu FBiH je 31.12.2007. godine, rok za dostavu analize neriješenih istraga, aktueliziranu podacima iz godišnjeg izvještaja za 2007. godinu, je 31.01.2008. godine, a rok za dostavu plana rješavanja neriješenih istraga je 28.02.2008. godine.***

*3. Aktuelnost analiziranja stanja neriješenih prijava i neriješenih istraga u tužilaštvima zahtjeva da glavni kantonalni tužioci već sada preduzmu potrebne mjere da se do kraja tekuće godine što je objektivno moguće više poboljša efikasnost rješavanja neriješenih prijava i neriješenih istraga kako bi se tekuća godina završila sa što boljim rezultatima.*

*4. Saznanja sa kojima raspolaže Federalno tužilaštvo FBiH ukazuju na neujednačenost postupanja kantonalnih tužilaštava u pogledu primjene odredbe člana 240 stav 3 Zakona o krivičnom postupku FBiH, dakle u situacijama kada Kolegij tužilaštva donosi odluku o potrebnim mjerama za okončanja istraga koje nisu završene u roku od 6 mjeseci.*

*Zbog toga se glavnim kantonalnim tužiocima dostavlja obrazac odluke o potrebnim mjerama radi okončanja istrage, koji ima za cilj ujednačavanje prakse postupanja kantonalnih tužilaštava u slučajevima kada Kolegij, u smislu člana 243 stav 3 ZKP-a FBiH, donosi odluku koje potrebne mjere treba preduzeti kako bi se okončala istraga koja je trajala duže od 6 mjeseci.*

*5. Glavnim kantonalnim tužiocima posebno se napominje da se obaveza izrada analiza i planova rješavanja neriješenih prijava i neriješenih istraga u tužilaštvima odnosi prvenstveno na otkrivena djela i poznate punoljetne izvršioce („KT“- upisnik), s tim što bi bilo neophodno da glavni kantonalni tužioci iste analize i planove donesu i u odnosu na „KTA“ predmete najkasnije do 15.04.2008. godine, a u odnosu na „KTN“ predmete najkasnije do 15.05.2008. godine, te ih u tim rokovima i dostave Federalnom tužilaštvu FBiH.*

*6. Glavnim kantonalnim tužiocima se preporučuje da kontinuirano obavještavaju i izvještavaju Federalno tužilaštvo FBiH o izradi analiza i planova rješavanja neriješenih prijava i neriješenih istraga.*

*7. U slučaju postojanja eventualnih dilema ili pitanja od strane šefova upisnika ili upisničara, glavni federalni tužilac je pripravan da održi poseban sastanak sa šefovima upisnika i upisničarima na kojem bi dao potrebna objašnjenja. U cilju lakšeg evidentiranja podataka dostavljaju Vam se primjerci odgovarajućih tabela u koje je potrebno unijeti pripadajuće podatke.*

**GLAVNI FEDERALNI TUŽILAC**

**Zdravko Knežević**

**Prilog:**

**- Obrazac tabele ( 1a, 1b, 2a, 2b)**

**- Obrazac odluke kolegija (član 240 stav 3 ZKP-a FBiH)**